

## CHRISTMAS MESSAGE

By: Rev. Dr. Thienkim Singson

Amasan Kouna Theng sim jouse nabon chauvin Christmas Chibai kahin peuve!

“...Eiho dingin naosen khat apiengin, chapa khat ei kipeuve...” Isa. 9:6

Aphat alhin tah in Pathen in Achapa ahin sollhan, chule ama chu Bethlehem a pieng ding ahi tin ana kisei jin ahi.

**I. I Pakaiyu pien phatlai chu.**

1). Leng li chana in vai ahoplai tah ahi. Ama chu Augustas Ceaser nikho laiya pieng ahin, Rome lenggam chu masanga sanga nasataha kehlet a um ahin, langkhat a Parthia gam hija adang langkhat a Britian gam geija ahouptha ahi. Luke 2:1 na a leiset pumpi lenggam tia kisei ahi.

2). Juda gam jong chu Romete vaihomna noija ana uma, midangho banga amaho jong hin kai(tax) anapieh u ahin, hiche phat laitah a hi Christa hung pieng ahi. Jerusalem chu Rome General Pompey in kum 60 masanga analah ahitai. Syria gama Roman Governor Cynerius kitipa hin Juda gam vai anapoh ahi.(ch.2). Hichehi Jud agama dinga kai(tax) apieh masah pen nao ahi. Cha pieng masapen Jesu Christa chu kai kidon masah pen phat a hung pieng ahi.

3). Hiche phat laiija thilsoh dang khat chu ahile, lenggam pumpia cham lungmon len laitah ana hi. Chamna lengpa chapa chu cham len laitah a pieng ding mong ahi.

**II. I Pakaiyu pienna mun hi melchihthei doltah ahi.** Micah 5:2 na a aseibang in, ama chu Bethlehem khopia apieng tan ahi. Danthu sunhon jong ana hetsao ahin, Matt. 2:5-6; milhamhon jong ana het u ahi. John 17:42.

Apienna mun hi melchihthei doltah ahi. Bethlehem kiti hi changlhah Inn tina ahin; van a kona hung kumlha changlhah, Hinna changlhah hung pienna dinga mun dihtah chu ahi.

Bethlehem hi David pienna le a kelngoi chinna khopi ahin, hijeh a chu David chapa pienna ding mun mong ahi. Masanglai miten Bethlehem chu Ephrah ana tiuvin hichu gasodoh tina ahi. Zion jong hi David khopi ma ma ahin, hijongleh Christa chu chuche khopia chun ana pieng pon ahi. Zion chu David in thanei tah leh ninglhing taha vai ana hopna mun ahi. Hijongleh Pakaijin ana lhengjo pon ahi.

**III. A pien umchan hi koh neitah ahi.** Ama chu chapa pieng masa pen ahin, hijongleh mivaicha tah Mary sunga chapa masapen hung pieng chu jaum loutah ahi.

1). Ama chu chapang bangkhat ho bang inponse a akijel in ahi. Masanglaija chu naosen hi adungsai na dinga pon a ajal/agah jangpet jiu ahi.

i) Ama jinlhun in a pieng in ahi. Christa jinlhun inn a apien hin, Amahi leiset chung a kholjin bouva hung ahi ti avetsah in ahi. Jinlhun inn hin ahung jouse a lhunsah banga, Christan jong ahenga hung jouse Asan sohkeiji ahi. Ama melchihna chu ngailutna ponlap akhai hi ahi, jinlhun inn dang tobang louva, Aman ahenga hung jouse chu ana lemlut sohkeiji a lhunman khatcha jong alah lou ahi.

ii) Jinlhun inn a mun a on lou jehin Ama gan inn sunga apiengin, naoloija lum lou vin, gan ankonga alum in ahi.

Anulepa vaichat jeha jinlhun inn chang joulou hithei ahi. Anina a hiche phatlaija chu nehguh chahguh hat jeha mihaosa danghon jinlhun inn neipa sum apeh guh jehuva, Ama khunna ding a kikoi chu mihaosa ana chang himaithei ahi. Athumna a, I Pakaiyu hi nasataha miho suhnem le musit ana chang ahi. Pakai Jesu jalla eiho jong musit le nahsahmo a ijatvei ium khah tah uvem?

2). Ama akidanna phabep aumin ahi. Naosen Jesu kelngoi chingpha kiti pa pien hi loujaova kelngoichingho henga hetsahin aum masapen in ahi. Amaho chun jan khovaha ihmu louva akelngoiu achin jehuva, Jesu pien thi Vantil in agaseipeh u chu ahetttheyiyu ahi. Hibang chu kelngoichingpha Jesun jong eiho hi sun le jan a eichin jingu ahi.

Vantillo lasah, “Chungnungpen a Pathen loupihen, chuleh leichunga Alunglhaina miho laha cham leng hen.” Pathen loupina dinga thil kibol na mun jousea hi chamna le lungmonna umji ahi.

Vantil ho chu thiempu ho henga kilah masading doltahu ahin, ahinla amaho chu thiempuho le houlamkaiho henga kisol jo louvin, kelngoiching mivaicha ho henga sol in aum jouvin ahi.

Jesu Christan apenna dinga leng Chanute hol louva, mi kineosah Mary joh akilhen ahi.

Apienna dinga Zion khopi loupitah sanga Bethlehem mun neo pen akilhen ahi.

Tunin eiho jong kigel phau hite. Christa nung jui kiti ngala, aniem le aneo lam lam sanga alien le asang jo anuomjo hol ihikhah diu ham? Christa khonung ijuilou uleh ama nungjui ihithei lou diu ahi. Lucifer (Satan) jong chun Pathien sanga letjo aguot jeh a leiseta kisol lha a gotmun meidil chu amale anungjui ho dinga Pathen in aguot joh ahi. Chamna Lengpa eiho sunga jong pieng hi nam ti kigel phau hite. Midangho toh iki chamthei lou uleh chamna lengpa eiho sunga um lou lai tina ahi. Bible in mijouse toh kitohdel a umna le thenna tai louva koiman Pakai amulou ding ahi ati. Heb. 12:14

Matthew 5:9 – Jesun, “Mi suchamho anunnom ahiuve, ijeh inem itileh amaho chu Pathen cha kiti ding ahiuve” ati.

Matthew 2 na a Ahsi Lekhathem hon Naosen Jesu aoime dan’u seijuhite. Gamlatah a konin phatsot tah lut in ahin hol un, achaina in Ama chu amudoh taovin ahi. Ahsi lekhatem hon

chapang Jesu amu phat uvin a goubom u ahongun, ama chibai bohnan, Sana, Bego, Myrth a peuvin ahi. Sana hin Leng avetsah ahin, Bego in Thempu ahiding avetsah ahin chule Myrth hin athoh gim genthei ding avetsah in ahi. Jesun thohgim gentheina nasatah ajoutan, tuhin Pa jet lama atouvin eiho din Thempu kin eibolpeh un, ajole Leile Van a Lengvai apoh ding ahi.

Sopi deitah ho, tuhi kikholchet phat tahbeh ahitai. Kum hitihchan Christmas mang ta a, atah tah a Christa neilou ihi khah diu kichat um tah ahi. Nunlekhan, natoh thilbola ipohdoh ngai tahbeh ahi. chuban a Christa kipana thupha ichan uhi midangho iti peh son thei ham ti ingaito khah jiuva? Kelngoi ching hon jong a thujah uchun imchah louvin midangho aseipeh uvin ahi. Midangho iseipeh lou uleh Pathen lunghanna ichunguva lhung tei ding ahi. Kelngoi ching hon amu le ajah hou aimchah pouvin, midangho hengah aseipeh uvin ahi. Ahsi lekhatem hon jong goulu tah hou it louhel in Naosen Jesu apeuvin ahi. Eihon la Jesu chu ipi ilodiu ham? Lhagaomangho lainatna ihaotengule, Pathen lunglhaina hintin ilahuva chamna le lungmonna kipathanop na dim ding ahi.